

迫切故如此啓之若以京穀送之大為稽緩況其道田稅元數不多
以此散給事更遣史官議于大臣尹仁鏡李也又議啓曰遇此
凶饑京外饑民正迫溝壑臣等亦豈無欲救之心乎前者閔釜
以御史往來忠清道請移京穀臣等以國無一年之蓄不許令
各司經費竭盡無儲只待田稅不可以此賑給也但忠州則可興
倉漕運昨日到江空船當還若以京倉久陳米六百餘石載送
越時分救則用舊儲新之意亦得矣鄭順朋議國儲雖竭人命
迫切不可不越時救之其道田稅姑令分給傳曰依領左相議
以久陳米五六百石載送令京官領去交付原州○日微暈夜
坤方如火氣

乙酉

上親行夏享大祭于太

廟○大司憲具壽駢執義李

鐸掌令南應雲姜偉獻納李致持平李瑛鄭浚正言韓智源
沈守慶啓曰司正崔斯貞賞加事臣等將公論論啓已蒙允俞
而大臣旋啓還授使公論不伸將貽後日之弊臣等忝在耳目
之地不能為有無不可在職請遞臣等之職答曰崔斯貞事文